

lantis; in aëre non mutatur; calori adaueto expositum crepitat, et igne rubente funditur, quin discidium ferat; in aqua facillime solvit; aleohol autem parvam illius quantitatem absunit. Centenarius constat ex: bromi 66,63 et potassii 33,37 partibus. Ob similes qualitates posset confundi cum jodido potassii; sed Bromidum Potassii, si illi acidum sulphuricum concentratum supersfundatur, nulos emitit vapores violaceos.

V. Stimulans; resolvens; in glandulas eodem fere modo ac jodidum potassii virtutem exserit.

U. Novissimis temporibus laudatum fuit a MAGENDIE in scrofulis, menostasia et hypertrophia ventriculorum cordis; bono etiam successu adhibitum fuit ab eodem in tumore lienis, quod etiam Dr WILLIAMS expertus est. Extrinsicus in usum dueitur unguenti forma ad dissipandos tumores scrofulosos, ut etiam ad profligandam tineam capitis, et herpetem madidum.

D. Grana duo ad quatuor, bis aut ter in die porrigitur adulto. Pro unguento sumitur drachma dimidia vel integra Bromidi Potassi ad unciam axungiæ, cuius serupulus aut drachma infriatur tumori.

### CALCARIA.

CaO.

CALX.

Известь.

Metallum leve Calcium, oxygenio junctum, Calcariam constituit, quæ variis corporibus in tota natura abunde inhæret. Occurrit Calcaria in fossilibus, præcipue cum acido carbonico instar cretae, marmoris, spathi calcarei, et cum acido sulphurico, ut gypsum etc.; in vegetabilibus cum variis acidis salium instar continetur; in animalibus tandem, acido carbonico junc-

ta, varias conchas et testas, eum acido autem phosphoricō et carbonico ossa constituit. *Usualia sunt:* 1) Calcaria, et Aqua Calcariae; 2) Carbonas Calcar.; 3) Chloridum Calcii; 4) Hypochloris Calcar.

### CALCARIA.

**CALCARIA CAUSTICA; CALX USTA seu VIVA.**

*Жженая известь.*

**R.** Carbonatis Calcariae nativi (Spathi calcarei, aut Marmoris albissimi) quantum lubet.

Fragmenta carbonatis calcariae in furno reverberii cum carbonibus sic colloca, ut strata utriusque alternent; tum ignem excita initio lenem, quem sensim adauge, et per plures horas sat intensem sustine; exempta e furno fragmenta Calcariae ustae immitte vasi terreo sat amplio, illisque tantillum aquae superfunde, ut in pulverem (**HYDRATEM CALCARIE**) dilabantur, quem crucibulo immissum igne candente denuo ure, ut ab acido carbonico prorsus liberetur. **Calcaria caustica** in vasis examussim obturatis servanda est.

### AQUA CALCARIAE.

**AQUA CALCIS.**

*Известковая вода.*

**R.** Calcariae causticæ partem,

Aquæ communis partes quinquaginta.

Calcariam lagenæ immitte, illique superfunde aquam. Liquorem quasi lacteum (**LAC CALCIS**), per vices agitandum, in lagenæ clausa per aliquot horas sepone; tum Aquam Calcariae, sedimento posito, in lagenas probe obturandas, et ex toto implendas, cante effunde.

**Q.** Calcaria massam exhibet albam, friabilem, inodoram, igne intensissimo difficulter fusilem; saporis est caustici, urentis, amari; linguæ adhæret illamque ex-

dit. Pond. specif. = 2,3. Centenarius Calcariae constat ex: 71,91 caleii; 28,09 oxygenii. Avidissima est aquæ et acidi carbonici; hinc aëri exposita eadem attrahit et in pulverem fatiscit. Quæ multum acidi carboniei attraxit, utpote usui medico inepta, facile cognoscitur, quod assusis acidis effervescentia suboriatur. Affusa aqua incalesceit, vehementer turgescit, et in subtilissimum pulverem album, hydratem calcariae (*Calx extincta*) dictum, dilabitur. Hydras calcariae solvit in 600 aquæ temperatae partibus, calidæ autem duplam exposeit quantitatem. Solutio saturata (Aqua Calcariae) limpida est, saporis alcalini; aëri exposita mox in superficie enticula (carbonate calcariae) tegitur, quæ dein fundum petit; hoc tamdiu appetet, donec ultimæ particulæ in carbonatem mutentur. In usum medicum nonnisi recens parata dicitur.


V. Aquæ Calcariae adstringens; antacida; lithontripica. Differt Calcaria a reliquis alcalibus imprimis eo, quod cohaesionem partium non minuat, sed potius fibras musculares et membranas mucosas roboret. Calcaria recens usta vim habet causticam.

U. Aqua Calcariae in morbis membranarum mucosarum præ cæteris inelaruit. In acore primarum viarum, colluvie pituitosa comitato, unciae duæ tresve cum laete, vel infuso quolibet aromatico, bis vel ter in die sumuntur. In mucoso alvi fluxu diurno et lienteria, in vomitu chronicò pervicaci, imprimis si membranæ ventriculi et intestinalium villosæ exulcerationes sublant, uti etiam in diarrhœa infantum, sedibus alvinis viridi colore distinctis, et muci copiam efferentibus, insigni pollet efficacia. In catarrho vesicæ urinariæ, morbo ætati senili præ cæteris proprio, stricturas ure-

thræ inveteratas plerumque concomitante, atque urina foetida, muco purulento referta, distincto, usus illius internus maximi est emolumenti; haud raro eadem aliquantulum diluta in ipsam vesicam urinariam injicitur. A multis lithontriptica ejus virtus laudatur, dum alii e contrario vim talem improbant. Utilitatem quoque promittit in variis renum affectionibus chronicis. Minime convenit lithiasi ex phosphate vel oxalate calcariæ, aut oxydo cystico vel xantico provenienti. Sunt exempla curati ope ejus diabetis tum melliti, quam insipidi. Ad sistendam blennorrhœam chronicam injicitur Aqua Calcariæ, pari portione aquæ diluta in urethram apud viros, in vaginam vero muliebrem vel parum diluta, vel prorsus non diluta. In chronicis alvi profluviis per modum clysteris, addito aliquando opio, juvat; hoc modo adhibita ascarides cum nido mucoso expulsisse prohibetur. Ulcera flaccida, saniosa, quin imo ipsum carcinoma haud inepte lavantur Aqua Calcariæ per se, vel cum infuso chamomillæ, quo saniei fœtor minuitur, et margines ulcerum salubriter incitantur. In exanthematis chronicis, utpote tinea capitis, psora, herpete, crusta lactea infantum, per modum lotionis admovetur, vel per se, vel cum oleo pingui, forma linimenti, quod etiam ambustis optime convenit (Videsis Linimentum Caleareum). In angina faucium ulcerosa gargarismata ingreditur, quibus tintura opii pro re nata additur. Si alvus usu ejus comprimitur, aut clyster injiciendus est, aut rheum scopo alvum laxandi porrigendum. Sub usu Aquæ Calcariæ sedulo ab acidis abstinentum, imprimis vero iis, quæ cum Calcaria sal insolubile constituunt, qualia sunt: acidum sulphuricum, phosphoricum, oxalicum, tartaricum, nec non a salibus, quæ hisce acidis constant.

D. Ab initio duæ vel quatuor unciae, aliquoties de die propinantur, ut scilicet vel libra per diem epotetur. Datur cum lacte vel juseculo carnium tepefacto.

**CARBONAS CALCARIAE.**



*Углекислая известь; Миль; Мраморъ.*

In variis Rutheniae oris reperitur, uberrimus vero ejusdem melioris notae proventus est in cretaceis collibus circa Tanaim, Volgam, Borysthenem, uti etiam penes oppidum Bielgorod et Schigri, Curseensis Gubernii. *Spathum calcareum, Marmor album, Creta alba, Testæ Ostreæ edulis (Conchæ), Lapiðes seu Oculi Cancri Astaci, Testæ ovorum avium etc.* referunt quæcunque Carbonatæ Calcariaæ plus minusve purum; hinc recte alterum pro altero sumi potest; postrema tamen concrementa animalia, utpote puriora et gelatinam animalem continentia, quo facilior redditur eorum conjunctio cum humoribus animalibus, usui interno aptiora esse videntur fossilibus, quæ iterum pharmaceutico scopo, ad paranda scilicet alia remedia, dum pura sunt, præferri merentur.

**CARBONAS CALCARIE PREPARATUS.**

Testas Ostreæ edulis, in aqua prius coctas, ut a sordibus liberentur (vel deficientibus his, Marmor albissimum), in mortario ferreo aut lapideo redige in pulverem tenuem, quem vasi ampio immitte, eique multam aquæ communis copiam superfunde; dein agitato sæpius vase, linque per aliquot momenta, ut crassiora subsident, et aquam turbidam, polline onustam, effunde. Hoc adsusa nova aqua tamdiu repeate, donec partes tenuissimæ separatae sint. In aquis effusis pulvis subtilissimus, tali elutratione obtentus, subsidet; hunc illico

siecatum in vase clauso usui servabis. Pulvis crassus, cui aqua non est sustinendo, iterum contusus, eodem modo tractari potest.

**Q.** In aqua pura minima quantitate solvitur, requirit enim 1600 partes ejusdem; in aqua antem acido carbonico saturata solubilior est; hoc modo aquis mineralibus solutus inest. Cum acidis effervescit; igne intensius candente acido carbonico orbatur. Centenarius constat ex: calcariæ 56,39; acidi carbonici 43,61.

**V.** Absorbens; exsiccans; antacida.

**U.** Carbonas Calcariae præparatus concoctionis viitiis, ex acido subortis, imprimis convenit; quo in easu ad semiserupulum vel integrum cum lenioribus aromaticis datur. In vomitu et diarrhoea infantum, quæ sedibus alvinis mucosis, virescentibus notatur, vel solus per se dosi 10 granorum, aut addito grano vel duobus pulv. radicis rhei, bis vel ter in die propinatur. In rachitide, nimia ossium mollitie distincta, usus Carbonatis Calcariae, diu continuatus, a nonnullis magni aestimatur.

**D.** Grana decem, triginta et amplius, ter aut saepius in die.

#### CHLORIDUM CALCII.

Ca, Cl<sup>2</sup>.

MURIAS CALCARIE SICCUS.

Хлористый кальций; Солянокислая известь.


**R.** Acidi Hydrochlorici quantum vis,

Carbonatis Calcariae, in fragmenta divisi, quantum opus sit.

Carbonatem calcariae parvis portionibus in acidum injice, nimiam evitando effervescentiam; acido prorsus saturato, solutionem per chartam colla, et in vase por-

cellaneo ad siccum evapora. Massam immitte erueibulo, eamque igne sensim adaueto liqua; tum super tabulam lapideam effunde. **Chloridum Calcii** adhuc calidum in pulverem crassum redige, et in vase vitro probe clauso serva.

**CHLORIDUM CALCI CRYSTALLISATUM.**



**Chloridum Calcii** aqua solutum ad spissitudinem syrupi evapora, tum in locum frigidum sepone, ut crystalli surgant, quas inter chartam bibulam exsicca, et in vase examussim obturando in loco frigido serva.

**Chloridum Calcii** raro tamen paratur in officinis pharmaceuticis compositione partium constituentium, quum plerumque sit residuum ex præparatione ammoniæ liquidæ.

**Q.** Massam exhibet solidam, albam, pellucidam; saporis est amari, aeris, salini; igne incandescente facile funditur, sed ne intensissimo quidem discidium fert. Centenarius siccii constat ex: chlori 63,36 et calcii 36,64 partibus. Aëri expositum deliquescit; aqua madefactum inealeseit. **Chloridum Calcii**, aqua crystallisationis non orbatum, glacie contusa vel nive commixtum, intensum frigus producit. In alchohole facile solvitur. Centenarius Chloridi Calcii crystallisati constat ex: chlori 32,23; calcii 18,64; aquæ 49,13.


**V.** Stimulans; resolvens; diuretica; sistema lymphaticum, glandulas et membranas mucosas potenter incitans. Majori dosi assumptum nauseam et vomitum excitat, quem variae nervorum turbæ, exitum vitæ minantes, subsequuntur.

**U.** In morbis systematis lymphatici et glandularum, quo morbus serofulosus imprimis referendus est, cum

successu adhibetur; hinc infaretis glandulis mesaraicis, tumentibus glandulis colli et inguinum, uti etiam ulceribus et impetiginibus opponitur. Exsudationes lymphaticæ, in hominibus leucophlegmaticis obviæ, interno Chloridi Calcii usu aliquando profligantur. In chronicis affectionibus membranarum mucosarum, mucum tenacem, viscidum secernentium, puta: catarrho vesicæ urinariae et leucorrhœa, uti etiam in ischuria renali, dum lotium muco et pure refertum est, si diutius propinetur, efficax esse remedium nonnulli adseverant. **SUNDELIN** laudat balnea ex Chloridi Calcii seseuncia, et chloridi sodii libris tribus, sufficienti aquæ quantitate ad implendum labrum balnearium solutis; balnea haec non modo enumeratis morbis apta esse, sed etiam in phthisi laryngea, quantumvis provectioni, hand spernendam afferre utilitatem contendit. Inhibetur usus Chloridi Calcii statu febrili, phthisi pulmonali, fracto vigore organorum concoctionis, uti etiam dyscrasia scorbutica vel putrida in organismo latitante. **Chloridum Calcii siccum**, ob vim aquam absorbendi, vario usui pharmaceutico inservit.

**D.** Datur plerumque aqua solutum, guttularum forma, dosi trium, quinque vel decem granorum aliquoties in die. Ad præcavendam ventriculi irritationem decoctum mucilaginosum superbibendum est.

**HYPOTCHLORIS CALCARIÆ.**



**CALCARIA CHLORATA;** **CHLORETUM CALCARIÆ;** **OXYMURIAS CALCIS.**

Хлористокислая известь.

**Rz.** Calcariae, recens ustæ, libras duas et uncias octo,  
Binoxydi Mangani libras duas,

**Acidi Hydrochlorici venalis libras octo,  
Aqua communis quantum satis.**

Calcariam aqua extingue, ut in pulverem dilabatur, et si opus sit, adhuc tantum aquæ adjicies, ut pondus hydratis calcariæ pulverulentî æquetur tribus libris cum dimidia; tum per aliquot horas eum sepone, dein per setaceum trajice. Pulverem hydratis calcariæ stratis tenuibus super tabulas extende, quas in area, undique claudenda, sic collocabis, ut altera alteri superimposita sit, et circiter spatium pollicis illis intercedat. Clusa probe area, et parvo foramine in parte ejus inferiori facto, gas chlorum per superiorem areæ partem intromitte. Chlorum elicies e retorta, balneo arenæ imposta, cui binoxydum mangani cum acido hydrochlorico immissum sit, illudque per aquam, in lagena bi-tubulari contentam, transmittendo prius elues. Evolutio chlori quam lenissima sit; quamobrem balneum arenæ, ineunte operatione, frigidum maneat, serius vero, dum evolutio ægre procedit, modice calefaciendum est.

Elapsis aliquot horis, postquam omnis chlori evolutio cessaverit, apparatus disjunge, et varia strata Hypochloritis Calcariæ simul intime misce, illumque in vasis probe obturandis serva.

**Q.** Est pulvis albus; acidum hypochlorosum redoleat; saporis adstringentis, amari; aëri expositus humescit, et, absorbendo acidum carbonicum, chlorosos emittit vapores. Chloreto Calcariæ venali, perperam ita dicto, nimia inest calcaria.

**V.** Antiseptica; fœtorem corrigit; colores vegetabilis dissipat.

**U.** Hypochloris Calcariæ uni fere usui externo, vel tollendi contagii, vel corrigendi fœtoris gratia, hueus-

que dicatus fuit. Ulcera foetida, gangrenescentia, saeviente gangrena nosocomiali, nec minus carcinomatosa, et quae ex bubonibus pestilentibus ortum dueunt, vel etiam, ut alii contendunt, ulcera syphilitica, ejus auxilio salubriter incitantur; quem in finem duae tresve drachmæ in aquæ libra solvuntur, et linteum carptum, hac solutione madidum, ulceribus superdatur, renovato saepius ipso linteo. In angina aphthosa, imprimis infantum, quam haud raro gangrena subsequi solet, teste **PERCY**, multum valet. **BOUNEAU** suadet penicillo, vel cylindro ex charta convoluto, aqua madefacto, et in Hypochloritem Calcariae siccum prius immisso, ulcera aphthosa, in interna buccarum superficie sita, attingere, exhibendo subinde collutorium quodlibet mucilaginosum. Alii hoc in easu præferunt linetum ex drachma dimidia Hypochloritis Calcariae, uncia mucilaginis g. aeaciarum, et uncia dimidia syrapi simplicis confectionis. Convenit forma collutorii, quibus ob dentis cariem, vel gingivarum exuleerationem, anima foetet, nec non iis, qui, fumo nicotianæ imbuti, spiritum edunt ingratum; paratur hujusmodi collutorium drachmam dimidiā in aquæ destillatae libris tribus solvendo, additis duabus spiritus vini unciis; liquor per chartam coletur. Ad restituendum dentibus flavescentibus, impuris, naturalem candorem **MAGENDIE** suadet pulverem dentifricium, ex Hypochloritis Calcariae scrupulis quatuor et pulveris subtilissimi coralliorum rubrorum drachmis sex compositum. Dum per modum lotionis adhibetur, pruritum vulvæ et sudores pedum foetentes tollere dicitur. Venena animalia destruere creditur, hinc rabiei caninæ et morsui viperarum obponitur. Vapores acidi Hypochlorosi destruendis emanationibus noxiis, et contagiosis quibusdam pares sunt. Eliciuntur autem hujusmodi

vapores, dum pares portiones Hypochloritis Calcariae et sulphatis potassae in vase aperto miscentur, addito aquae tantillo, ut pultis speciem nanciscantur; vel sponte evolvuntur ex Hypochlorite Calcariae aëri exposito, quum acidum carbonicum in aëre contentum absorbeat; hinc insigni pollet efficacia ad corrigendum fætorem ex cadaveribus, latrinis et piscium mercatibus emanantem. Dum Acidi Hypochlorosi vapores in conclavi evolvere necessitas urserit, circumspecte procedendum, ne aër atmosphaericus, nimiis ejusdem vaporibus oneratus, noxius evadat; quamobrem pro conelavi medioeris capacitatis drachmæ duæ Hypochloritis Calcariae cum totidem sulphatis potassae sufficient. Cimicibus et pulicibus profligandis idoneum fertur. Magna præterea est illi vis in destruendis coloribus vegetabilibus.

D. Drachmæ duæ tresve ad aquæ libram pro usu externo.

### CARBO.

Уголь.

Corpora vegetabilia et animalia, si in vase clauso, quin aër aut oxygenium accedant, urantur, in Carbonem convertuntur, qui pro ratione substantiæ, e qua obtinetur, peculiari insignitur nomine. Inter fossilia parimodo occurrit. Carbo autem, dum purus, merum est carboneum. Usuales sunt: 1) Carbo ligneus; 2) C. animalis; 3) C. Spongiæ (quem videsis in parte tertia).

### CARBO LIGNEUS.

C. VEGETABILIS.

Древесный уголь.

Ad varios usus pharmaceuticos seligantur frusta majora Carbonis lignei vulgaris, e lignis levioribus, imprimis tiliæ, obtenti, nitore expertia, et rejiciantur

nitentia, vitri ad instar in fractura splendentia; haec in vase fictili clauso, operculo perforato, denuo urantur, donec nullum amplius fumum edant; tum supra laminationem ferream ab adhaerente cinere, follis ope, liberentur, et priusquam ex toto resfixerint in pulverem redigantur, qui in lagenis probe obturatis in loco siccо servandus est.

**FULIGO PURIFICATA**, Carbo ferme purus, sequenti modo paretur: Fuligo communis ope alcoholis in massam pultaceam redigatur, et in crucibulum infareciatur; dein obtecto crucibulo, per horae dimidium, in furno reverberii, igni intensius candardi exponatur; tandem exempto et frigefacto crucibulo, ut praecedens servetur.

**Q.** Coloris est nigri; odoris et saporis expers; igne non funditur; calorem ægre transmittit. Recens ustus Carbo saporem et odorem in liquidis vegetabilibus et animalibus, quin imo colorem in illis demit; varia gasa et vapores absorbet, et eo magis, quo porosior est. Salia plumbi, stibii, zinci et argenti e solutionibus absunit. Carbo ligneus communis præter carbonicum varia heterogenea continet; interdum non nisi pars, interdum vero quatuor vel quinque partes horum centenario insunt; talia sunt: potassa, calcaria, magnesia, quæ acido carbonico, phosphorico, sulphurico et chloro junctæ obveniunt; præterea oxydum mangani et ferri, nec non silicea.

**V. Antiseptica; fœtorem corrigens.**

**U.** Ad tollendam sordium putredinem ex prava alimentorum indole, pulvis Carbonis lignei recens usci, et gasa evoluta absorbendo, et processum putrefactionis inhibendo prodest; hinc etiam juvat in diarrhoea, dum alvus est fœtidissima, quo in casu forma clysteris

eum infuso seminum lini adhibetur. Infantibus, præsentे ventriculi acore, alvo viridi et vomituritione laborantibus, recte datur.

Externus ejusdem usus multo latius patet et tutior est. In ulceribus gangrænōsis et sphacelo, decubitus diuturnum sequente, juvat pulverem Carbonum largam manu adspergere, superadditis aliquot guttis olei terebinthinæ; alii pastam e fermento panis (aut farina seminum lini) cum aqua et pulvere Carbonum præferunt. Vel solus, vel cum cortice cinchonæ, optimum sistit pulverem dentifricium. Carbo pulveratus, atque cum æquali surfurum triticorum portione mistus, si tibialibus aut calceis inspergatur, sudorem plantarum pedum aarem, fœtentem, cohibere dicitur. Adhibetur ad purificanda et decoloranda varia liquida empyreumatica colorata, utpote: spiritum frumenti, acetum, acidum tartarium, tartarum erudum, aliasque solutiones salium. Carnem et cadavera animalium, visceribus liberata, si pulvere Carbonis lignei recens ustī probe obtegantur, et vasis hermetice clausis, eodemque pulvere replendis, immittantur, per plures menses posse servari, quin putrescant, experientia docet. Filtra Carbonem ligneum, vel solum, vel sabulo puro intermixtum continentia, purificandæ aquæ maxime idonea sunt; impedit etiam Carbo quominus aqua putrescat, hinc interna doliorum superficies, conservandæ aquæ inservientium, a classiariis in Carbonem convertitur. Immittitur quoque sellis familiaricis et latrinis ad retinendos vapores fœtidos ex iis erumpentes.

D. Adulto serupulus ad drachmam vel duas; infantibus grana quinque ad decem, ter quaterve in die. Pro elystere uncia dimidia, ad integrum.

CARBO ANIMALIS.


Жиросный уголь.

Obtinetur qua residuum in vase destillatorio, dum ossa animalium distillationi siccæ subjiciuntur. Carbo hujusmodi, ut a salibus calcareis liberetur, cum acido hydrochlorico digerendus est, et quidem: decem partes Carbonis animalis digerantur per biduum sub frequenti agitatione cum acidi hydrochlorici officinalis parte, duodecim aquæ partibus diluti; hoc facto, tamdiu aqua pura lavetur, donec aqua lotionis nulla saluum vestigia manifestet.

Q. Coloris est nigri; splendoris expers. In pulverem redactus ne sit coloris rufi, neve cinerei; rufus color carbonem non satis ustum fuisse indicat; cinereus vero, ustionem nimis diu fuisse protractam. Si pulvis Carbonis animalis cum aqua destillata coequatur, liquor per chartam colatus sit coloris expers. Centenarius Carbonis animalis, qui cum acido hydrochlorico non fuerat digestus, continet 6, et raro 8 partes carbonis puri; reliquum constituunt phosphas, fluas ac carbonas calcariae.

U. Carbo animalis potissimum adhibetur in Pharmacia ad absumentam materiam colorantem, quæ productis crystallinis vegetabilium adhæret, hinc ad decorandum hydrochloratrem morphiæ, disulphatem chiniae aliaque salia alcaloidum.

CHINIA.




Xununъ.

Materia alcaloides peculiaris, quæ in cortice omnium cinchonæ specierum, imprimis vero cinchonæ cordifoliae (cortice cinchonæ flavo seu regio) sat co-

piosa occurrit. Methodus illam obtinendi primo a PELLETIER et CAVENTOU anno 1820 publici juris facta fuit. Chinia cum acidis salia constituit; acido sulphurico duplice modo jungitur, et resert: Disulphatem (Subsulphatem) Chiniæ — ex 2 at. Chiniæ et 1 at. acidi sulphurici, nec non Sulphatem Chiniæ, ex pari atomorum numero utriusque constantem. *Usualis est:*

**DISULPHAS CHINIÆ.**



**SULPHAS CHININI.**

*Спирнокислый Хининъ.*

**R:** Corticis Cinehonæ cordifoliae libras quatuor,  
Acidi Hydrochlorici officinalis uncias tres,  
Aquæ communis libras quadraginta quinque,  
Calcariae causticæ uncias quatuor cum dimidia.

Corticem cinchonæ contusum coequo cum acidi hydrochlorici uncia et aquæ libris quindecim; liquorem limpidum effunde, et residuum binis adhuc vicibus cum pari aquæ et acidi quantitate decoque. Decoctis simul mixtis, et calefactis adjice calcariam, duabus aquæ fervidæ libris antea dilutam; præcipitatum inde exortum, chiniam cum partibus calcareis continens, saepius adfusa aqua elue, super linteum expande et, fortiter compressum, leni calore exsicca; tum alohole purissimo (pond. specif. = 0,83) fervente chiniam extrahe; quod cum novis alcoholis quantitatibus quinquies aut sexies iterabis, donec a præcipitato calcareo omnis chinia absumatur. Liquorem per chartam colla; alcohol destillatione elice; residuum fusco-rubescens, resinosum, est **Chinia impura**; hanc solve in aqua destillata servida, cui acidi sulphurici officinalis  $\frac{1}{3}$  pars prius addita fuit, et adjectis

Carbonis animalis (ossum) pulverati partibus  
triginta,

ad ebullitionem calefac, atque liquorem adhuc fervidum  
per chartam cola, ex quo frigefacto crystalli Disulphatis  
Chiniæ surgent.

Si carbo nimium acidi sulphurici absumeret, et eo  
ipso chiniam, in liquore etiamsi servido dejiceret, tan-  
tillum acidi esset addendum, antequam liquor coletur;  
necessere est enim, ut charta heliotropio tineta ab eodem  
leviter tantummodo rubescat.

Crystalli Disulphatis Chiniæ, dicto modo obtentæ,  
needum ex toto puræ et albæ sunt; ut tales siant, ite-  
rum in aqua leviter acido sulphurico acidulata solven-  
dæ, et carbonis animalis auxilio depurandæ sunt. Re-  
siduum liquidi, quod ultra in crystallos cogi nequit,  
ammonia liquida resolvendum est, et Chinia dejecta  
denuo in disulphatē explicato modo convertenda. In va-  
sis probe clausis, a luminis accessu muniendis, servetur.

Q. Crystallos sistit aciculares, albas, odoris exper-  
tes, saporis amari. Aquæ ad + 12° R. temperatæ 740  
partes, bullientis vero 30 necessariæ sunt ad solutio-  
nem; pars Disulphatis Chiniæ solvitur in aleoholis pu-  
rissimi frigidi 80 partibus, in servido autem multo co-  
piosius. Aëri expositus fatiscit, partem aquæ crystalli-  
nationis amittendo. Centenarius constat ex: chinæ 71,66;  
acidi sulphurici 8,73; aquæ 19,61.

Sæpe adulteratur saccharo, gummi, amylo, sulpha-  
te vel acetate calcariae, nec non steatino. Saccharum  
detegitur, sal suspectum in aqua solvendo, et chiniam  
potassa liquida præcipitando, quo sapor emergit dul-  
cis, si saccharum fuerat admixtum. Gummi et amyllum  
innotescunt sal in aleohole purissimo digerendo: Di-  
sulphas Chiniæ solvitur, heterogenea autem manent.

Sulphas et acetas calcariæ sale combusto præbent residuum. Steatinum dignoscitur, si sal leni exponatur calori, ex quo materia animalis difficit, Disulphate Chiniæ manente; vel etiam si in acido sulphurico diluto solvatur, quo steatinum habetur residuum. Si salicinum eidem esset substitutum, hoc eo patefit, quod salicinum ab acido sulphurico rufetur, Disulphas Chiniæ vero colorem non mutet.

V. Tonica; in plexum hepatico-splenicum, totumque nervorum systema agens; antifebrilis præstantissima; antiperiodica.

U. Præparatum hoc, quod duobus abhinc decenniis, usui medico dicatum fuit, iisdem serme morbis convenit, ac cortex cinchonæ; quum vero exiguae molis sit, nam vix decimam partem corticis constituit, a ventriculo commodius fertur, hinc sæpius ejus loco adhibetur. Nibilo tamen secius caudalarum et contraindicationum, sub Cinchonæ rubrica uberior expositarum, memores esse oportet medentes, validum hocce remedium in usum vocaturos.

D. Grana duo, tria, quatuor, pro dosi, vix cessante stadio caloris porrigitur, ita quidem, ut ter quaterve per nycthemeron, usque ad sequentis paroxysmi horam, talis dosis exhibeatur.

## CHLORUM.

Cl.

Хлоръ.

Chlorum, quod anno 1774 a SCHEELE primo detectum fuit, ab eodem Acidum Muriaticum dephlogisticatum nuncupabatur; serius a BERTHOLETTO nomine Acidii Oxymuriatici designatum est; tandem vero anno 1810 a Celeb. DAVY, qui inter elementa illud retulit, Chlo-

rum seu Chlorinum fuit appellatum. *Usualia sunt:* 1) Chlorum; 2) Aqua Chlori; 3) Vapores Chlori.

### CHLORUM.

#### GAS OXYMURIATICUM.

R. Chloridi Sodii partes sexdecim,  
Binoxydi Mangani partes undecim cum dimidia,  
Acidi Sulphurici officinalis partes triginta duas  
cum dimidia,  
Aqua partes sexdecim.

Chloridum sodii et binoxydum mangani, in pulvrem tenuem redacta et probe mixta, immittit retortae vel cucurbitae vitreæ tam amplæ, ut capaeitate sua sexies vel octies molem contentorum superet; his superfunde acidum, aqua prius dilutum et refrigeratum. Collum retortæ vel cucurbitæ, tubo vitro incurvato munitum, hermetice obtura, et initio absque ullo caloris augmento, sub finem vero balneum arenæ, cui retorta vel cucurbita insidet, calefaciendo, gas super aquam calidam, vel super solutionem saturatam chloridi sodii in balneo pneumatico in lagenis probe obturandis collige. Eliciendo gase occupatus spongiam marinam humefactam ori et naribus habeat præfixam, ne vapores inspirati noxam pulmonibus induant.

Q. Solita aëris temperie et atmosphæræ pressione est gas coloris flavi virescentis, ponderis specifici = 2,470, si aërem atmosphæricum = 1 ponas. Secundum experimenta FARADAY, in liquidum densatur, si ad temperaturam + 12° R. pressioni quatuor atmosphæræ æquiparandæ subjiciatur. Nec respirationi, nec combustioni sustentandæ aptum est; odoris peculiaris integrati; parva quantitate inspiratum excitat tussim, quam haud raro hæmoptysis subsequitur, phthisi ansam præ-

bens. Pro antidoto Chlori habentur vapores aquei protinus inspirandi. Centum pollices cubici Chlori, teste DAVY, pondus habent 77 gr. Troy - W. vel ferme 80 granorum med. Norimb.

U. Ad conficienda quædam præparata chemico-pharmaceutica adhibetur.

#### AQUA CHLORI.

#### AQUA OXYMURIATICA; ACIDUM OXYMURIATICUM.

Chlorum elice modo supra dicto, et retortæ vel cucurbitæ collum apparatui Woulfeano lege artis junge. Lagenas ad  $\frac{2}{3}$  aqua destillata imple; tubi communicantes in aquam sint immersi; lagena prima munita sit tubo securitatis, parimodo in aquam merso; lagena ultima ope tubi vitrei communicet cum vase, solutionem hydratis calcariæ (lac calcis) continentem, ut, quod Chlori nimium est, ibidem absorbeatur. Ad properandam absorptionem lagenæ aqua vel nive frigesaciendæ sunt. Ad communem temperaturam aqua binas Chlori mensuras recipit. Sexdecim unciae chloridi sodii largiuntur 5000 pollices cubicos Chlori, hinc sufficiunt saturandis 2500 pollicibus cubicis aquæ, vel circiter 100 libris.

Q. Coloris est pallide flavescentis, tantillum virescentis; odoris ingratii, Chloro similis. Colores vegetabiles demit, et Chlori ad instar foetorem tollit. Hydrogenium absumit plerisque corporibus organicis, illo abundantibus, et mutatur in acidum hydrochloricum; hinc cave misceas illud cum syrupis compositis, extractis et mucilaginosis. Servanda est Aqua Chlori in lagenis opacis, vel in loco obscuro et frigidiusculo, nam potentia lucis solaris discidium fert: Chlorum jungitur hydrogenio aquæ, et mutatur in acidum hydrochloricum, quod solutum manet, oxygenio avolante.

Ad indagandam quantitatem Chlori aqua soluti, auctore DUFLOS, sic procedendum: chloridum barii solvit in decem partibus aquae, gase acido sulphuroso (spiritu sulphuris per campanam) saturatae. Hujusmodi solutio tamdiu adfunditur Aquæ Chlori disquirendæ, donec odor illius prorsus evanescat, et liquor turbari cesseat. Sulphas barytæ, qua præcipitatum obtentus, in filtro aqua destillata lavatur, et dein siccatur; 20 grana hujus præcipitati siccii designant 6 grana Chlori, vel si mavis, septem cum dimidio pollices cubicos ejusdem.

V. Stimulans; antiseptica.

U. Adhibetur in iisdem fere casibus, ac acidum hydrochloricum, scilicet in morbis putridis et gangræna. In febri, sic dieta, nervosa et typho abdominali, a nonnullis magni aestimatur; sed quum Aqua Chlori, si diutius servata, vel si cum mucilaginosis et syrupis præscripta fuerit, partim resolvatur in acidum hydrochloricum: multa pars virtutis hujusce salutaris acido potius in acceptis referenda videtur. Ingreditur garganismata, anginae gangrænosæ adcommoda; inservit lotiōibus, quæ ad tollendum fœtorem ulcerum efficacia sunt.

D. Guttæ 15 ad 20 vel 30, bis in die, cum aqua destillata exhibentur adulto; vel drachmæ duæ tresve, ad unciam, cum semuncia sacchari unciis octo aquæ destillatae adduntur, eujus misturæ quavis hora cochlear mensale propinatur.


VAPORES CHLORI.

R. Chloridi Sodii uncias decem,  
Binoxydi Mangani uncias quatuor,  
Acidi Sulphurici officinalis,  
Aquæ communis, utriusque uncias octo.

Chloridum sodii cum binoxydo mangani et aqua in vase vitro aut sietili misce, et subinde acidum sulphuricum adfunde.

Suffumigatio hæc, a GUYTON MORVEAU proposita, efficaciter adversus effluvia putrida potest; num vero habitu respectu ad morbos epidemicos famam, qua gaudebat, jure promerita sit, valde dubitamus, quum nec in febri flava, quæ a. 1828 ad Fretum Herculeum invaluit, nec in cholera morbo, nuperrime in Europa sæviente, virtutem ullam antimiasmaticam manifestaverit. Vapores Chlori adhibentur imprimis ad purificandas vestes et merces, quibus contagium inhærere creditur, ut etiam ad corrigendum aërem in valetudinariis, carcerebus et navibus. Quum autem Chlori Vapores, si inspirati fuerint, magnum adferant sanitati detrimentum, suffumigatio hujusmodi, nonnisi remotis antea ægrotis, in conclavi quolibet est suscipienda. Quantitas vaporum in praecedenti formula, e decem unciiis chloridi sodii elicienda, æquatur 3600 pollicibus cubicis Chlori, illaque sufficiens censenda est ad purificandum conclave, quod 6 arschin altum, 5 arschin latum et 10 arschin longum foret, ideoque 300 arschin cubicorum capax esset. Generatim scire licet, mensuram unam (capacitate) Vaporum Chlori sufficere ad dissipandum quodvis effluvium putridum in 1800 mensuris (capacitate) aëris corrupti. Remotis itaque ægrotis, clausis fenestris ac portis, vas emittens vapores in medio collocandum. Conclave maneat clausum per duarum horarum spatium, quo elapsso, vas auferendum, cunctaque aperienda, ut perflatus accedat.

## CREOSOTUM.



*Креозотъ.*

Liquor æthereo-oleosus, coloris expers, recentissimis temporibus a REICHENBACH detectus, et ab eodem Creosotum (ex Græco ζῷας caro, et σῶζω conservo) nuncupatus, quum principium hocce, quo fumus, acidum pyrolignosum et pix liquida seatent, conservandis carnis maxime idoneum sit. Modus illud parandi sequens est:

Pix liquida (e ligno fagi, minime vero e pini speciebus obtenta) tamdiu distillatione tractatur, donec residuum spissitudinem picis Burgundicæ acquirat (ut e centum partibus picis liquidæ 40 remaneant); dum autem vapores pallide flavescentes (paraffinum indicantes) predire incipiunt, operatio protinus sistenda; in excipulo conspicua fiunt duo strata, supremum et infimum, medio liquore aquoso divisa. Stratum supremum abundat eupione; liquor aquosus medius seatet acidis; stratum vero infimum multum Creosoti, paraffino et picanaro juncti, continet. Stratum infimum a supernatantibus, quæ rejicienda sunt, sedulo separatur ae, leniter calefactum et agitatum, carbonate potassæ saturatur.

Liquore frigefacto, oleum ponderosum, a solutione salina separatum, *secundæ destillationi* subjicitur, nunquam tamen ad siccitatem usque. Destillatum initio prodiens, interdum aquæ supernatat, quod eupion abundare testatur, quapropter tamdiu rejicitur, donec aqua gravius et fundum excipuli petens productum obtineatur, quod, distillatione finita, potassa liquida (pond. spec. 1, 12) solvitur. Pars producti insolubilis est, et liquori supernatat, quæ, ut heterogenea continens, abjectitur. Solutio alcalina in vase aperto sensim calefit,

donec fervescat, quo fuscum induit colorem, oxygenium absorbendo. Liquore frigefacto, **Creosotum** (impurum), addito acido sulphurico diluto, liberatur, quod separatum, et potassae liquidæ aliquantulum excedenti junctum, cum aqua ex retorta vitrea *tertiæ destillationi* subditur. Aqua initio prodiens, et pauxillum **Creosoti** continens, iteratis vicibus ex excipulo in retortam, jacturæ præcavendæ gratia, refundenda est. Liquore diutius fervente, calor enim 100° excedere potest, operatio tandem sistenda est. In retorta manent: difficilius destillatu picamarum, sulphas et acetas potassæ, nec non materia fusca. **Creosotum** (impurum) in excipulo obtentum, et ab aqua separatum, iterum potassa liquida solvitur; oleum supernatans rejicitur. Solutio alcalina iterum in vase aperto fervesit, et dein refrigeratur. Addito denuo acido sulphurico diluto, aliquantulum excedente, **Creosotum** liberatum iteratis vicibus aqua frigida tamdiu abluitur, donee aedi vestigia evanescent, atque *quartæ* jam cum aqua ex retorta vitrea *destillationi* submittitur, dein iterum potassa liquida solvitur. Si operationes modo dictæ ex voto processerint, **Creosotum** potassæ liquidæ ex toto jungitur, et nullum eupion amplius secernitur, neque calori expositum fusco tingitur colore, sed leviter tantum rubescit. Sin secus, adhuc *quinto* et *sexto* potassa liquida solvendum et *destillatione purificandum* est. Tandem **Creosotum**, potassa liquida solutum, addito acido phosphorico liberatur, probe lavatur et, cum aqua ex retorta vitrea destillatum, elicitor purum. Hie obiter notandum, retortam, sub indicatis operationibus, nunquam profundius ipso fluido in ea contento in balneum arenæ immergendam, eamque in parte superiori accurate panno crasso et villoso obtegendarum esse, ne **Creosoti**

vapores intempestive densentur, priusquam retortæ collum attingant. Servandum est in lagenis probe clausis, charta nigra obductis.

Creosotum censetur esse principium, ejus ope cadavera condita veterum Ægyptiorum, nomine Mumiarum nota, tot seculorum discrimini exposita, ad hoc usque tempus sarta tectaque remansere. Compertum est etenim, corpora mortuorum in Ægypto, substantiis bituminosis impleta, aucto calori exposita fuisse (quod combusta in hisce cadaveribus membra testantur); hoc modo Creosotum fuisse generatum, vero videtur similimum. Experimentis a CORMACK institutis probatum est, carnes esculentas, solutioni illius (Creosoti pars, aquæ partes 100) per 12 horas, vel duo nycthemera immersas, et dein calore solis vel ignis siccatas, diutissime servari posse. Secundum quosdam virtus haemostatica *Aquæ Binelli* huic principio in acceptis est referenda. Plantæ aqua Creosoti irrigatæ fatiscunt, pisces insectaque eidem immersa brevi intereunt.

Q. Spissitudinis est oleosæ, pellucidum, coloris expers; odoris peculiaris, fumum vel carnes suffitas redolentis, qui tamen, habita ratione variarum picis specierum, e quibus elicetur, aliquantulum varius esse solet; saporis urentis, sub finem dulcescentis. Pond. specif. = 1,037. Effervescit ad + 162° R., non congelatur ad — 22°. In aëre libero ardet flamma vivida, multum sumi emittendo. Jungitur aquæ dupli proportione: vel pars Creosoti in 400 aquæ partibus solvitur; vel 10 aquæ in 100 Creosoti diffunduntur. Alcohol, æther, sulphuretum carboni, eupion, petroleum, acidum aceticum et alcalia quavis proportione illud recipiunt. Nec alcalium, nec acidorum potentiam manifestat. Adulteratur oleo picis ponderoso, saepius recti-

sicato, ex piee pini obtento; frans facilis est detectu: Creosotum solvitur in acido acetico et potassa liquida, oleum vero remanet immutatum.

V. Stimulans; narcotica. Vis ejus albumen coagulandi, notatu dignissima est, utpote cui virtus antisep-tica et hæmostatica debetur.

U. Inter remedia, quæ ad sistendum vomitum pro-pinantr, nullum esse valentius hocce, testantur ELLIOT-son, T. THOMSON, BODINGTON, imprimis dum malum a nervorum debilitate, non autem a vitio ventriculi ori-ginem repetit; feminis hystericis, quin imo ipsis gra-vidis, absque noxa dari potest; inhibetur vero strenue gastritide suspicata. In lotii secretionem incerto modo agit, quam interdum minuit, interdum vero auget; se-cretæ tamen urinæ, terebinthinæ ad instar, odorem sibi proprium impertitur. Multi virtutem ejus in can-cere aperto salutarem experti sunt; multi vero contra-ria referunt. In pernione recenti vel exulcerato utile est remedium; quem in finem vel aqua solutum, vel cum oleo olivarum (guttae 5—10 ad unciam olei) forma linimenti adhibetur; hoc modo applicatum etiam pro-desse dicitur in mammarum excoriatione. Ad curanda ulcera scrofulosa, phagedænica et venerea, uti quoque ad sedandam gingivarum irritationem, ex prægresso mercurialium usu, aqua Creosoti efficax esse fertur, vel penicillo partibus adfectis admota, vel forma lotio-nis aut collutorii cum quolibet liquido mucilaginoso. Valet ad sistendum e vasis capillaribus sanguinis stillicidium; in vulneribus autem, per primam intentionem curandis, linteum Creosoto madidum, hæmorrhagia si-lente, protinus amovendum, ne inflammationi adhaesivæ obstaculo sit. Quoad vim illius in cohibendo e vasis majoribus sanguinis fluxu, multorum opiniones hucus-

que discrepant. In menorrhagia aqua Creosoti dilutior, injectionis modo adhibita, profusse visa est. Laudatur in odontalgia a carie dentis orta; priusquam vero remedium applicetur, ipsa dolorifici dentis cavitas sedulo purganda et siccanda est, partesque vicinae gossypio vel linteo muniendae, ne affluens saliva in dentis cavitatem irruat, tum demum tenuioris penicilli ope, Creosoti puri gutta una alterave in dentem corrosum immittitur, isque gossypio impletur, cavendo, ne linguæ, buccis et labris noxa inferatur. Dum odontalgia rheumaticæ indolis est, testante FREMANGER, juvat collutorium ex quatuor guttis Creosoti puri et duabus aquæ destillatae unciiis compositum.

D. Porrigitur aqua solutum, vel mucilaginoso liquido exceptum, vel forma pilularum cum quovis extracto, a gutta, ad duas, vel tres, caute dosin augendo ad sex guttas, bis vel ter in die.

### CUPRUM.

Cu.

*Mn. 46.*

Cupri mineræ frequentissimæ sunt: oxydum, chloridum, sulphuretum, sulphas, phosphas, carbonas, nec non arsenias ejusdem; invenitur etiam nativum. In Rossia exstant Cupri fodinæ in Nertschinsk, alpibus Uralensibus et Altaicis, præprimis vero (magnis glebis) in Werchotursk. Occurrit præterea sat copiosum in variis regionibus Europæ et Americae. Ad obtainendum metallum mineræ ustulantur, dein addito carbone igni intensiori funduntur. Usuales sunt: 1) Sulphas Cupri crystallisatus; 2) Sulphas C. biammoniatus; 3) Acetas C. crystallisatus.

Q. Coloris est rubidi, nitore insigni præditum, durum, sonorum, laminatum resilit, in fila ductile, in

bracteas tenuissimas extendi potest, et tune colore e rubro flavescente insignitur. Pond. spec. = 8,87. Non nisi igne candente, scilicet ad 27° WEDGWOOD, vel circiter ad 850° R. funditur, qui caloris gradus inter fusionis punctum argenti et auri medius est; calore magis adancto in vapores abit. Aëri humido diu expositum crusta virescente obdueitur, quæ carbonas cupri est. Igne rubente calefactum suboxydo tegitur. Cuprum dum purum est, in acido nitrico ex toto solvitur; solutio hujusmodi nec addito acido sulphurico nec quolibet chlorido solubili turbatur, et adsusa ammonia liquida coloris fit cæsii intensioris, nullum dejiciendo sedimentum. Si in solutionem nitratis cupri lamina ferrea immergatur, omne Cuprum forma pulveris dejicitur, qui prius acido sulphurico diluto, dein aqua probe ablutus, et igne fusus, refert Cuprum ex toto purum.

V. Cuprum metallicum, non oxydatum, vitæ animali non tam est infestum, ut passim creditur. TODD THOMSON vidit duos infantes, quorum uterque monetam cupream minorem deglutiuerat; hac forma metallum apud unum per duos, apud alterum vero per sex menses in intestinis remanserat, quin ullum sanitati detrimentum attulerit. Quum vero Cuprum ex quolibet acido, etiamsi vegetabili, imprimis dum pulveratum est, oxydari et formam salis assumere aptissimum sit, haud raro venenum fit, si deglutitum fuerit. Symptomatum series hoc in casu plerumque sequens est: sapor fit stypticus, æruginosus, vix in ore et lingua delebilis; insequitur cibi fastidium, nausea et vomitus; accedunt dolores modo regionem epigastricam, modo abdomen, modo pectus adficientes; serius insinuatur agrypnia cum continua animi agitatione; ægri tandem, sub latentium virium signis, deliramenta loquuntur, et con-

vulsionibus exercentur, quæ interdum, exorta paralysi, hemiplegia vel etiam apoplexia, vitam funditus evertunt. Aliquando observatur etiam exanthema lepræ simillimum. Antidota sunt: albumen, nec non subphosphas sodæ, quoniam subphosphas cupri insolubilis est.

Dum Cuprum in liquido quolibet suspecto detegendum est, sequenti modo procedendum: liquidum coquatur cum acetо destillato, dein per chartam coletur, quo Cuprum a partibus vegetabilibus et animalibus separatur. Hoc facto per illud transmittatur gas hydrogenium sulphuratum; præcipitatum exortum (bisulphuretum cupri) siccatur, et in tubulo vitro comburatur; combusto addantur aliquot guttae acidi sulphurici, et sulphas cupri exorietur, qui, aqua uberiori adfusa, diluendus est; si in solutionem sulphatis cupri lamina ferrea nitens immagratur, Cuprum metalli instar illi adhæredit. Vel, si in solutionem sulphatis cupri ammonia liquida exuberans instilletur, color solutionis læte cœruleus Cuprum prodit. Vel etiam: si solutioni sulphatis cupri gutta una alterave borussialis potassæ ferrosi, aqua soluti, instilletur, mox dejicitur præcipitatum fuscum (cyanidum ferri et cupri).

U. Est Cuprum consueta vasorum materia, in quibus alia, atque alia, tum medicamenta, tum alimenta ac potulenta, parantur, coquuntur, adservantur; hæc culinaris supplex, nisi rite stanno obducat, labem contentis communicat, et perniciosa fit. Dum liquida diutius in vasis cupreis aut æneis aëri exponuntur, crustum tenuem virescentem in superficie exhibent; hæc carbonas cupri est; si autem liquidum acetum continet, acetas cupri generatur. Solent coqui interdum ad impertiendum variis leguminibus lœtum viridemque colorem, monetam cupream inter coquendum adjicere: quam

perniciosum hoc sit, sponte patet. Præstat in laboratorio pharmaceutico ad paranda imprimis extracta, vasis e stanno puro confectis uti.

### SULPHAS CUPRI CRYSTALLISATUS.

$\text{CuO, SO}_3 + 5\text{aq.}$

VITRIOLUM CÆRULEUM.

Спирокислая окись меди; Медный купоросъ.

Venalis plerumque edueitur ex sulphureto cupri nativo; quem in finem mineræ aëri humido diutius exponuntur, dein elixantur et in crystallos coguntur. Quum Sulphas Cupri, hoc vel alio modo in officinis chemicis obtentus, sæpe inquinatus obveniat, sequenti modo parari potest:

R. Ramentorum Cupri quantum vis.

In vase aperto consperge per vices acido sulphurico diluto, et totum tamdiu libero aëris accessui expositum linque, donec omne metallum corrosum sit. Massam salinam in acido sulphurico diluto solve, et ad crystallisationis punctum evapora.

Q. Crystalli plerumque sunt prismata hexagona, coloris cœrulei, et aëri expositæ satiscunt. Pond. spec. = 2,2. Saporis est adstringentis, nauseosi, metallici; tinetur am heliotropii rufat. Non nisi ad 200° R. omni aqua crystallisationis orbatur, calore autem intensiori discidium fert, oxydo cupri residuo. Sulphas Cupri crystallisatus solvitur in duabus partibus aquæ bullientis, et quatuor aquæ frigidæ. In alchole non solvitur. Centenarius salis crystallisati constat ex: oxydi cupri 31,8; acidi sulphurici 32,14; aquæ 36,06. Venalis disquirendus est, utrum ferro vel zinco inquinatus sit. Solvatur in ammonia liquida; si ferrum continet, hoc

erit residuum. Zincum innotescit, si Sulphas Cupri venalis in aqua solvatur, et per solutionem aliquantulum acidulatam gas hydrogenium sulphuratum, quo usque præcipitatum appareat, transmittatur; liquidum, a sedimento separatum et per chartam colatum, sulphatem zinci continebit, si zincum admixtum erat.

Insociabilis est Sulphas Cupri salibus sequentibus: carbonatibus alcalinis et ipsis alcalibus; baborati et subphosphati sodæ; acetati ammoniæ, nec non acetati et subacetati plumbi; præterea acetati ferri; nitrati argenti; bichlorido hydrargyri; chlorido calcii; tartrati potassæ, et generatim adsociari nequit infusis et tincturis vegetabilibus, principio adstringente pollentibus.

V. Emetica; adstringens; haemostatica.

U. In angina membranacea (Croup), octava grani pars omni quadrante horæ infanti annum, ad septem annos nato, vomitus ciendi et membranæ spuriæ educendæ causa propinatur; ne tamen plus, quam grana duo consumat. Opio potionatis grana decem, duabus aquæ unciis soluta, forma haustus emetici, porrigi solent.

Extrinsicus virtute stimulante prodest in ulceribus torpidis et impuris, forma unguenti aut solutionis. Qua escharoticum adhibetur ad corrodendas excrescentias fungosas. Splenia, solutione Sulphatis Cupri maledacta, vi qua pollut styptica, in epistaxi et aliis haemorrhagiis utilia sunt. Ingreditur etiam collyria, quæ in ophthalmiis chronicis, purulentis, non sunt despicatui habenda.

D. Infantibus ab  $\frac{1}{2}$  ad  $\frac{1}{4}$  grani, saepius in die, scopo emetico; adultis a grano ad grana decem. Extrinsicus: grana duo, vel quatuor, ad aquæ unciam.

SULPHAS CUPRI BIAMMONIATUS.

$\text{CuO}$ ,  $\text{SO}_3$ ,  $2\text{N}^2\text{H}^6 + \text{aq.}$

CUPRUM AMMONIACALE.

Rx. Sulphatis Cupri quantum vis,  
Ammoniae liquidæ concentratae quantum opus  
sit.

Sulphatem cupri in pulverem tenuem contere, et in ammonia liquida solve. Liquorem per chartam colatum vasi ampio immitte, eique aequalem mensuram alcoholis purissimi superfunde. Vas obturatum sepone per hebdomadam, dein absumpto alcohole crystallos collectas inter chartam bibulam exsicca, et in vase vitro probe obturando serva.

Q. Prismata sistit tetragona, rhomboëdra, coloris læte cœrulei; saporis ingratii, metallici; alcalium indolem manifestat. Aëri si exponatur discidium patitur, ammonia avolat, et oxydum cupri, attracto acido carbonico, in carbonatem cupri abit; hinc colorem induit virescentem. Solvitur in aquæ parte cum dimidia. In alcohole non solvitur. Centenarius constat ex: ammonia 27,92; oxydi cupri 32,2; acidi sulphurici 32,58; aquæ 7,3.

V. Irritans; adstringens; antispasmodica.

U. Interno usu profusse fertur in epilepsia, chorea, aliisque spasmoticis morbis. Celeberrimus CULLEN docet, remedium hoc nunquam ultra mensem esse continuandum. Extrinsicus solutionis forma cum successu ulceribus flaccidis admovetur; collyria quoque, ophthalmiis chronicis idonea ingreditur.

D. A quarta grani parte ad grana tria vel quatuor, dosin sensim augendo, bis in die, datur adulto, pilularum forma. Pro solutione, extrinsicus ulceribus ad-

movenda, granum, vel quatuor, in aquæ uncia solvuntur. Pro collyrio grani dimidium ad integrum, ad unciam liquidi.

ACETAS CUPRI CRYSTALLISATUS.

$\text{CuO} \cdot \bar{\text{A}} + \text{aq.}$

ÆRUGO CRYSTALLISATA.

Уксуснокислая окись меди.

Rz. Æruginis venalis quantum vis,

Aceti destillati quantum opus ad solutionem.

Liquorem per chartam colatum in crystallos coge,  
quas exsicca, et in vase obturato serva.

Nisi Ærugo præsto foret, parari etiam potest sequenti modo:

Rz. Sulphatis Cupri crystallisati uncias sex cum dimidia,

Acetatis Plumbi crystallisati uncias novem et drachmas septem.

Utrumque sal sufficienti aqua solve, et solutiones misce. Liquorem colatum in crystallos coge.

ÆRUGO seu VIRIDE ÆRIS (Ярь медника), artis productum est, ex acido acetico et oxydo cupri, varia proportione junctis. Ærugo cærulescens paratur in regionibus viniferis; quem in finem laminæ cupri calefactæ vinaceis, fermentationem acidam subintrantibus, cooperiuntur, et per mensem et ultra corrodendæ relinquuntur. Ærugo derasa cum aceto in massam pulchram conteritur, et variis compressa formis venum datur. Est hujusmodi Ærugo plerumque **Disacetatas Cupri** =  $(\text{CO})^2 \bar{\text{A}} + 6\text{aq.}$  Centenarius illius constare dicitur ex: oxydi cupri 43,34; acidi acetici 27,45; aquæ 29,21. Ærugo virescens obtinetur, dum laminæ cupri, pannis aceto madidis tectæ, aëri exponuntur.

Hujusmodi Æruginis species continet acetatem cum disacetate et trisacetate cupri varia proportione mixtos.

**Q.** Acetas Cupri crystallisatus sistit prismata rhomboëdra obliqua, pellucida, coloris viridis intensioris; saporis est ingrati, metallici. Solvitur in 13 temperatæ et 5 bullientis aquæ partibus; solvitur parimodo in alcohole. Centenarius salis neutri constat ex: oxydi cupri 40; acidi acetici 51; aquæ 9 partibus.

**V.** Adstringens; escharotica.

**U.** Intus raro exhibetur, nec est commendandus usus illius. Extrinsecus forma solutionis ulceribus atonicis superdatur. Ingreditur quoque collyria, blepharophthalmiæ chronicæ purulentæ aliisque adcommoda.

**D.** Pro solutione extrinsecus admovenda, granum, vel duo, ad unciam liquidi; pro collyrio eadem quantitas in quatuor unciis solvitur.

## FERRUM.

Fe.

Железо.

Ferrum raro invenitur nativum, sed plerumque oxydatum et minerarum forma, unde eliquatur crudum (**Ferrum fusum**, *Изгнано*), quod ulteriori tractatione in Ferrum ductile, imo etiam in chalybem convertitur. In vegetabilibus et animalibus ejusdem vestigia non desunt. *Usualia sunt:* 1) Ferrum limatum; 2) F. pulveratum; 3) Oxydo-Sesquioxydum Ferri; 4) Sesquioxydum F.; 5) Hydras Sesquioxydi F.; 6) Carbonas F. cum Hydrate sesquioxydi; 7) Chloridum F. crystallisatum; 8) Sesquichloridum F.; 9) Hydrochloras Ammoniae ferrosus; 10) Sulphas F. crystallisatus; 11) Sulphuretum F.; 12) Jodidum F.; 13) Cyanidum F. et Potassii; 14) Sesquiyanidum F. cum Cyanido Potassii; 15) Cyanido-Sesquiyanidum F.; 16) Tartras F. et Potassæ; 17) Carbonas F. mellitus (quem videsis in parte tertia).

**Q.** Coloris est ex cinereo albescenis, nitore insigni præditum; durissimum omnium metallorum; per-